



秋澗先生大全文集卷第六十

碣

大元國故尚書省左右司員外郎韓公神道碣銘并序

夫朝廷山林之士有往而不返入而不能出者惟其  
勇於靜退貞不絕俗是則爲丈夫之事吾於鄉先生  
韓公得之矣公諱仁字義和父顯有融德不耀公甫  
冠而孤事母以至孝稱好學強識聞一善事樂爲而  
不厭食正大間舉孝廉辟爲州孔目以能充元帥府令  
史方羽書交馳際公勵精所事爲上官推重番譯史  
安天合爲相文善壬辰北渡隱居鄉間澹嘿無所營  
庚子歲詔行臺於燕開莫府選叅佐得良能爲亟用

安侯薦首聘公充尚書省都事癸卯春以國計北觀  
上詢以金粟川流蘿圖鞏固將何策司濟對者以十  
數獨公敷陳詳明簡而得要有鑒古訓用賢材之說  
上喜甚仍奏天下困窮者寔繁其徒方發政施仁之  
秋宜子惠俾露大賚允焉迄今貧子月給廩料蓋自  
公伊始是年秋丁母梁氏憂尋奪哀起授左右司員  
外郎公早夜在公以吏務自任郎中李獻卿才望重  
兩朝亦許公和光解紛能就吾事又明年冬以祔母  
夫人得告南歸既襄事偕內子張氏棄俗入道自號  
逍遙子遂西游太華終南諸山黃冠野服偃然閱世  
如老松卧雲壑者逾三紀焉公資明淑生平與物無  
忤其篤賢周急有大過人者宗族藉之通達者甚衆

嘗買僮即約之曰汝等以世故不幸及此義則黽勉  
相從否則任渠所往晚節專以方書濟人為事聞一  
秘方竒訣求訪百至易千金不吝歲久得益多如煙  
霞醫林等集悉錄梓流布猶虞所傳未暢擇標治者  
遍書里巷壁間京師物繁歲多竒疾賴公起死者不  
勝紀例來謝辭不見曰吾庶幾道念濟苛苦而已餘  
何異當時少傅竇公亦以醫方談客多獵神農經所  
載為用公則博採經驗所謂海上方者錄之無遺二  
公雖趣向不同於博施則一也故竇韓之名並傳于  
世先是道人謝志賢等歆公進退有道心存濟物殆  
非尋常所可及遂請主神寶修真二觀餘三十年奉  
公猶一日公有二姪長曰天祐泰鹽提舉次德旻由

後衛從事充樞密院令史德旻以公耄期迎置家庭  
與妻苑氏侍養送終禮無少憾士論賢之公以至元  
十九年十月望日考終牖下享年八十有四某月日  
將歸窆汲縣耿岡之新壠墓頌銘以鄉耆故來屬筆  
其敢以蕪斐辭銘曰

顯允韓公

生有淑質

陳力周行

孝廉應辟

移而為忠

載揚厥職

濟物之心

一何云亟

漢署千官

含香入侍

經國之對

允合

眷思

片言回春

仁者之賜

脫筵榮貴

神武挂冠

退身急流

又人所難

全真為教

樂在一簞

青囊集驗

揀夫世瘼

旁搜博施

一壺市間

保合大和

浩浩其天

我鍊我形

我駐我顏

較彼獨善

九鵬一鷗

栖遲有窠

逍遙有篇

青山白雲

玄門老仙

黃岡北原

騰焉故山

惟耿新壠

繫公改遷

魂兮來歸

諒先生之所安

大元故濛溪先生張君墓碣銘并序

余官晉府者四年得進修之士一人曰濛溪張君每  
暇與相往來把酒論文寂可尚者君無求於人人之  
有得於君殊冲然也私自哀念異時禮文興舉吾儻  
與當任渠責及承乏翰林君墓草已宿乙未夏其子

思敬來京師謁余以墓銘爲請慰唁餘爲歎歎者久之言猶在耳其忍以不敏辭君諱著字仲明姓張氏世爲襄陵縣張相里人曾祖諱某雅重然諾顧義所在雖死生以之祖愿父彬皆潛德不仕讀書治田子孫相傳以爲家法君少穎悟不待勉勵卓然自志於學國朝戊戌歲設科取士君以詞賦中選既而嘆曰士當遠大自期雕蟲篆刻將何爲哉適貽溪麻先生洎前進士允齋曹文來主經局君喜且不寐曰今而後吾學有所正矣遂刮去故習沉潛伊洛諸書雖飢渴寒暑貧窮得失不易其初心所謂道之體用文之華實探涉其源流咀嚼其膏味積而爲文詞發而爲事業不盈不矜介然家居以樂育諸生爲業中統

建元順齋張公以直道清節宣撫河東廉君才行擢主潞城簿政廉能以畏愛稱明年公去事齟齬不可爲以親老西歸有司累辟不就至元乙酉用薦者授平陽路儒學教授於是衆論大厭士風爲一變先生年彌高德彌劭學益博文益竒士友知所依嚮吏民咸有矜式秩竟不聽其去者逾再考厥後子思敬自南陽教官來省聞彼中風土樂焉曰名山大川平日所願見遂命駕南遊以至元壬辰夏六月廿六日考終寓舍享年六十有九初娶陶寺里大家趙氏一子思敬二女長嫁同邑王黼次適洪洞梁龜齡繼室油沃靳氏孫男二曰世權世衡思敬以家學今充隆福宮宮教先生姿明亮色夷而氣清爲人誠厚寡欲不

戚戚於貧賤與人交始若疏澹久之愈敬而愛人百  
負之終不較望而知為雅德君子其成就後進為已  
任故晉人以文名而達者多出其門切惟亾金百年  
來平陽號稱多士每歲舉子赴選大約數倍諸郡至  
有白首場屋庶幾一第餘有不暇及者唯君年甫冠  
即能知所學所從拔出習俗潛心古道踐履外詩文  
雜著曰濠溪集者五百餘篇何多矣哉晉絳諸人未  
之有也况一辭一藻典雅有法理明辭約以自得為  
主是可銘銘曰  
四科稱賢曰德與藝其在聖門用不偏廢文乃道與  
經天緯地苟遺其本則編何異利祿科場疇非誕誇  
聯綴補綴是足言邪濠溪為學其復不返洗心程張

正藝曹麻閉門窮經其書滿家玉珮瓊瑤粲焉碎華  
含章時發其助也多士之生世濟時行道時既我乖  
立言明教生榮歿傳朝菌夕蓼達人六觀彼此奚較  
大川河宗名山華崧地靈氣異先生所鍾一朝長遊  
杳焉飛鴻世皆知仁智之所樂吾獨為歸根返壑乃  
先生之所終凌倒景而不滅其元精耿耿固浩乎其  
所不窮適來吾時適去吾從先生之心與造物也從  
容尖山西東相里新宮我銘斯石如勒景鐘雖陵遷  
兮谷變尚知為濠溪先生之封

故趙州寧晉縣善士荆君墓碣銘 并序

元貞元年春康訪荆侯改道北燕過京師來謁再拜  
以先表屬筆因念子與侯初定交於廕陶一見如平

生後十年復會于東楚握手道舊勉子南行忠厚之  
氣霽然萃顏間令人有不能忘者今以是來託載惟  
疇昔其敢以固陋辭謹按典瑞少監焦養直善狀君  
諱祐字伯祥趙之寧晉人世陶浚濱逮祖暨禰以改  
工是圖曰與其供噐用於一鄉曷若以善及人為愈  
於是板行五經等書不二十寒暑荆氏家籍布滿河  
朔君甫冠而孤每以保大家業為志貞祐兵乃取五  
經泰和律義篇讀韻板閱墟垠中亂定來視盜發掘  
無幾君悉力補購隨復為完部或者云初歲書待善  
本固多准取是三者何哉曰經者道之本法者治之  
具韻者字之始文籍所由生其為善已多聞者為知  
本于時官府生聚雖稍稍有立詩書法律晚生後輩

不知為何物一旦得是如瞽者復明迷者之知津也  
而又印模精取直廉故售者廣屋日為之潤所可重  
者積而能散縣人王壹者坐事累繫獄吏挾私欲死  
之君力與營救彼不顧且諷而微賄竟傾貲出之渠  
來謝却不見曰吾區區若然者憐渠罔陷非辜餘何  
有壬子歲州縣通籍冒占者有禁里嫗瞽而來依者  
惻然以乳姆收恤轉易書畫往往宿負審其寔既折  
元券復惠之書嘗有以女奴來償者辭不克娉而良  
焉斯皆風義矯矯人難能者率樂為之故鄉里無親  
疏以善人稱君以丁巳秋遘疾遺命仲子元綱曰伯  
叔二喪未克葬汝勉襄大事以卒吾志言終而逝實  
是年八月八日也壽五十有九歲先坐昭穴君資和

易處事明敏終以失學為愧恨及諸子長皆教之讀書嘗訓飭曰吾已面墻無及今幸嗣先業庭戶間書帙紛縉豈有資人進修賢不自力將何以免君子之譏且先世易治而喪所期正爾汝曹其勉旃君初娶劉氏繼室蘇民生四子長國器中戊戌詞科次國用善屬文皆前卒次元綱自幼有成人風君嘗語所親異時保家子也竟如言季幼紀為人雅重信道篤少從敬齋李先生學所得為多由典瑞貳卿擢任風憲今為山北遼東道廉訪使女一適進士張景賢孫懷寶勇孫九人曰謹曰詢曰誠曰謙曰謚曰誼曰諒曰詒曰諏女孫五人一在室餘皆適士族曾孫九女孫如之於戲盛哉予然後知善惡之報至子孫而後定

者審矣銘曰

繫土居業擇術是先有篤者志善乎變遷捨鈞治書理幾於妍顯允荆君思深業專誓教子而亢宗見截書之有權要本孝義奉而周旋萃英敷華煥乎簡編迪我後人學者賴焉磊落載腹宛從蹄筌積厚能散憫窮技寬不有其社委順百年慶流後裔子孫蟬嫣人定彼勝其然亶然二子翩翩遺珠在淵仲克世荷愿而稱賢季由近侍三使輜軒較夫善利孰大斯傳固惟自稽古之力實資藉之所緣欲報之德有昊者天刻我銘章于晉之阡適追來孝以慰下泉異時推耆德而配鄉社尚有攷於瑤鐫

洪品老人石琰公墓碣銘 并序

公姓石琰氏諱德玉字君寶遼東蓋州人疎髯矐目  
氣骨臞清超超然如萬里之鶴貞祐初以良家子  
軍效夏折橋功得官積勞至武德將軍北渡後  
相衛間母杜氏唐相如晦後公天性能孝愉色  
班衣垂白朝夕孺慕雖菽水無有南陵白華之  
時杜壽登八秩清修絕葷茹日庭間白菌百  
余本掇去復茁者數月人以爲孝感所致  
詩有似憐甘旨闕春風玉芝香之句  
篤趨人之急逾於己私至遇不  
竹木花石時釀名酒客至輒  
而後已眼花耳熱與之扶策  
之某處手植而即蕃者也此

也眇柯怡顏喜津津溢眉睫間曰吾且富有家不待  
四壁矣嘗種竹當戶或謂太迫曰待其蓂茂秋霽月  
之時俾清樾透簾爲此君寫真耳故終日翛然對之  
揮灑爲樂其清澹如此晚年游心命書人有問必以  
脩已安分爲荅能此不待孤虛相聒吾言固有徵矣  
歲丙子公年八十有五嘗繪共山歸隱圖以自歌其  
貧樂因號共岳老人是歲冬灑然而逝若委蛻焉孺  
人劉氏能遂公初心主治中饋不知其爲貧家也生  
女子二人長適御史康天英次適河東道提刑按察  
使姜或家府與公交款曲篤出契三十年一別終天  
有恨何如尋步入街西故里眇睠竹樹慨然有聞遂  
懷人之陰老淚濡毫而有斯作銘曰

貧而樂有類乎黔婁心而隱似慕夫德翁事親極融  
融之樂逢辰出蹇蹇之忠布衣歸來然而白容將裴  
徊而孰友侶藜藿而伍岳松生也順事歿寧吾躬古  
之所謂鄉先生死而祭于社者其處士之堂封乎

大元故廣威將軍寧晉縣令李公墓碣銘

公諱讓姓李氏其先易水黃山人也父海姿善良世  
樹藝為業公既孤母張氏以健持家就熟南遷至寧  
晉唐城鄉愛其風土遂占籍為縣人公初生顛骨有  
異狀及冠美鬚鬚聲音如鍾為人善騎射勇於赴義  
為一方推服貞祐初河朔失守所在寇盜充斥日相  
吞噬公慨然輟耕龍上團結鄉豪游獵陸澤荆藿間  
以保庇井邑為事蓋有所需以明歸附之志歲己卯

天兵南下公與兄直首率里人迎拜女兒那顏於軍  
門嘉其效順授直行寧晉縣事公管軍總校仍聽元  
帥蔡國公節制時歲荒民飢道殣相望縣東有水柵  
曰瀝城大澤瀰漫周浸百餘里菱芡魚鳧資生之物  
甚富民往依大獲厥所庚辰秋金冀州將柴茂以兵  
來取兄與公力戰而前直死焉公憤大兄敗歿衆又  
失所庇以圖報復瀝為誓雖食頃不忘也繼從縣長  
王帥復奪其柵居無幾茂復合大勢來爭前次滿氏  
泊公聞之盡匿精銳於瀝傍二十里叢葦間以弱誘  
茂令之曰伺彼過聽金聲而作親驅數百人前逆鋒  
線交即陽北逗茂逾紀氏塢金鳴伏發茂腹背受兵  
大挫其銳公回戈追奔五戰皆捷自是異人聲燭不

敢復窺漳垠矣瀝城用以全安帥閫酬勞授主本縣簿乙酉冬武仙以真定叛麾下劇節副鄭進等乘勢剽掠趙癭陶迤東悉為丘墟公度力不可支收合餘燼此與鼓藁二王帥合勢併破劇鄭諸砦賊數百級而還所失保聚生齒皆得復故丙戌冬仙復令劇鎮戍趙州明年春從大兵規取克焉時太師木花里以王爵顯封拜錄公前後功授公行鼓城帥府右監軍仍佩銀符使顯異焉既而陞充本縣令以寧昌為世封於是招流亾布恩惠畫井開起市集鄙居有貿易之利田里無追呼之擾四民樂業外戶為不扃矣至若督田務抑游墮扶寡弱法姦蠹是又公之所必行繼而歲慳民有衣食不自給者公發私藏以贍之富

足帥府聞之為復其三年公雖貴必耕而食蚕而後衣君嘗以榜揭門扉私囑干謁請毋相覲其廉守如此癸丑春以老致仕令男天澤嗣職優游里社日課子孫耕鑿為務嘗芥桑田間或勸之公曰官時來則為農吾家素業我若爾兒輩尚墮而自安或者謝而去古人稱貴而能賤丈夫之事公其有焉以至元十一年十月廿二日考終牖下享年八十有七越四日葬縣西北下王里之新塋禮也祖送者幾萬人夫人祕氏趙氏張氏子男六人長曰天澤歷寧晉元氏兩縣簿次天祿本縣奧魯千戶次天祐監寧晉酒次天祚不仕次天祥次天祐某鎮巡檢女四人長與次俱適趙氏次適牛氏次適郝氏男孫一十九人女孫一

十三人重孫男一十八人重孫女一十三人初公畜家僮數百指悉縱遣為良曾無鬻身分役之責人又欽其德厚云天祿性孝義乞乞有父風以北孟舊塋屢為溲浸所啣遂改卜於此既襲事贄禮幣百拜來請銘予方問俗浚濱見其遺黎故老脫離兵革六十餘載猶為懷思王李諸人眷眷不忘有配社尸祝之報嗚呼貞祐之亂可謂離且瘼矣元元之民莫適所歸不為人所魚肉必轉死溝壑如王李諸公雖奮棘矜起壠畝至於父子昆弟出死力角群豪經營捍蔽使一方奠安又識夫天運所在挈民去危邦而就興國誠亦出人意表一時賢豪者也甫定後復能俾官府生聚日就完好今歷官鄉曲歲時拜墓于于而來

者皆曩時不能自存之嗣續也其德民之厚感民之深又何止童不雉捕長江之虎渡者哉宜其子孫繩繩執紼皆有所立然後知德施於民功被一時者大之垂報何其豐且阜哉

瘿陶北郊

里號下王

顧瞻佳城

蔚乎蒼蒼

是為晉長

李公之截

惟是李公

千夫之防

果毅之勇

木訥之剛

奮身隴畝

舉圖義匡

貞祐南播

雲擾之倣

割據侵凌

互相魚肉

民匪殲夷

轉死溝谷

宛彼瀝城

居水之腹

菱芡魚鳧

大益不足

聞公來依

襁負相續

如鹿走音

如鳥棲木

四境騷然

獨為樂國

耿氏昆仲

旌旗部曲

既復兄讎

又知所屬

草昧初分

官府始置

戰我武幹

明天吏治

內守以廉

外方以義

撫循有方

興滯補弊

扶弱抑強

繩姦束吏

百戰遺黎

竟保終惠

民之戴公

頌聲嗷嗷

尸而祝之

懷思罔替

勒銘豐碑

尚克永世

大元國故河中府南北道航橋總管謝公墓碣銘

墓碣銘

君諱企石字仲進其先燕之香河人父世國初拜金

吾衛上將軍河東路總帥繼其仲子也為人性行淑均沉實有碩慮既冠嘗從父西破川蜀每領牙隊居前當破門際掩目慄心未嘗以嗜殺為快雖執訊獲醜力為全活者甚衆用勞充秦鞏路軍儲大使辦集有方餉道為不乏丁已夏先帥薨君實主其喪纒杖瘠立躬起塋壙棺衾儀物既易可觀會者大說復樹豐碑昭德神道其例新任有光焉大兄維石襲父職役軍中行臺檄君以例繼執不可曰兄念天顯極友愛碩其不啻若手足然家事一聽予勲鞠立之責正在今日竟以其嗣徃代其適追永言之思友于邱孤之義蓋終身焉其爾過於人遠甚者類多此晚節以故侯失將駕下澤乘欵段遊居中條田間耕牧卒歲

裕如也至元乙亥冬十二月廿有六日以疾終平陽  
所崇道里私第之正寢得年五十有五官至河中府  
舡橋總管越三日厝於府東神泉鄉之南里原從遷  
隴也萬口稱惜咸以善人歸焉夫人劉氏晉之平陽  
人德柔嘉主內事殊嚴生三子長曰純克家有立志  
次曰繹謹愿鄉子道季夭女一適裴氏子孫男一人  
未名既卒哭嗣子純來求表其墓道予私念其故昔  
孔子遇舊館人喪脫駟馬以賻曰吾惡夫涕之無從  
也吾於予西道之主人也從游讌語姁姁然蓋三年  
于茲殆非過客之有頃其可辭不敏君生長秦晉  
韉囊馬問而禮度雍雅不知為將家子與人交信厚  
麟如終始無間言其在諸弟間棟華輝蔭惟恐弗及

又出天稟粹然也嗚呼以君之德之壽較之有不相  
稱及者仍哀之以辭銘曰

蒼茫兩間生也倏寓一氣之來命有定數彼修短與  
奪理則有之若不擊夫善惡積習之故嗚呼謝君一  
僨而去孝友淑善曾終始渝素天之報施如此豈定  
者不可奪來者固所與也將子孫延昌以求其終譽  
邪吁

昔亦被賜故將仕郎汲縣尹韓府君墓表

府君姓韓氏諱澍字巨川其先陳留酸棗人世以儒  
業顯遠祖有方官至大司空六代祖璿累階銀青榮  
祿大夫五季間北渡河遂占籍為衛人榮祿生朝奉  
大夫祗德朝奉生八十一秀才奕山山生渤亦舉進

士渤生相善居室遂用富饒於君爲曾祖祖悅有淳  
德不耀父仲字仲寬所居以善行稱君自穉齒性沉  
潛寡言笑群兒劇里中過不少睨宗黨異焉稍長以  
刀筆起家用言者爲安陽吏主掾以能入爲府屬吏  
丙辰歲 朝廷以相之五縣封 太弟爲米邑繼郡  
帥例肆覲君毅然以民計從行及敷對稱

戶曹孔目官明年春降璽書起聘君大  
原高公鳴爲彰德路總管遂汰冗員擢群能新舊圖  
至設府吏不數人君首以才選無幾轉按牘提控官  
夙夜在公勵精所事閱六歲克勤猶一日大爲總尹  
所知守錄事叅軍至元二年轉官制行積前後勞授  
以縣尹下車首以美俗邵農爲務願謂僚屬曰富足

者禮義之資耕桑者風化之本至於飾亭傳謹迎候  
奉 上官徼目前譽非吾所知也於是下教條課戶  
丁斲藁薄植桑菓以敦大本非農隙不許入城市暇  
則行縣檢視勤墮而賞罰焉自是邊隰的的榛惡爲  
有間鄉隣有以忿閱訟於庭者君曰孝悌力田親仁  
善鄰古之善道初無大故何乃至尔論而遣之至頓  
不率教則曰聽兩造明曲直是不難恐一置于罰終  
身玷辱爲鄉黨指誚吾惜汝者此也儻不吾念論如  
法比秩滿五事備舉所獲來暮之歌厥聲載路矣五  
年用新銓法勅授將仕郎主高唐縣簿九九月與疾  
歸明年卒於絃歌里舍得年四十有八實至元庚午  
春二月一日也越十有九日從葬安陽縣西陵鄉武

官原之新塋母李氏時年八十拊柩而哭之慟曰天  
乎遽奪我純孝至此酷邪聞者憫其賢孝縣君金相  
人進士秦公之孫配君德良稱生子男三長曰從益  
自憲臺六察史今為燕南河北道提刑按察司書史  
次從憲從革女明童適王氏子男孫四人後九年歲  
戊寅冬十一月七日終祔安玄堂之左禮也初縣境  
夏大旱比致禱私念事之壅底獄之鬱滯亦沴氣是  
致乃裁決牢繫為一空及禱蒼山祠雩舞未收雲幢  
幢起中谿翼日雨盈尺繼謝祠下車還衆曰尹精誠  
若是當有回馬雨表公虔至半途果然尋鄰道以蝗  
災告備已而竟不入境縣狀其異以聞是秋為有年  
君溫雅有沉量慮事遠善措畫臨政暇裕畧不動聲

色亦未嘗矜喜以己長格物其孝愛友悌出天秉粹  
然不忍一朝違母氏側嘗行役踰時眷焉陟岵寢饋  
為不安於承顏孺慕若此其至初見第季既多枝葉  
蕃衍門戶事繫重故挺身更業盡心所事匪厥躬是  
私期於庇本根寬父母抱者幾三十年若府君者可  
謂克孝克恭念顯養志者矣其祖妣韓是為君女叔  
曰叔也君之嗣從益廁某行為外弟一日謁  
而請曰先人棄養庵踰八年坎不及誌有術未法唯  
是表於墓左者又闕罪惡之大無可言若銘則尚於  
兄焉有託某追惟祖妣平生之言得君抱為最詳因  
繫之以銘銘曰  
於鏗韓氏世為儒之宗芳影纓若綬揚歷位乎公兮

猗嗟裔孫掾習匪其躬兮黽勉從事養夫親之志兮  
庇我本根治葛藟之義兮聖哲所稱吾今見其人兮  
於穆府君諒彼古之倫兮兩漢循吏鑄頑以成仁兮  
嗚呼令尹誠亦吏之循兮予銘撫實其敢過爲文兮  
魂而有靈尚懔嘆之一伸兮

秋澗先生大全文集卷第六十

秋澗先生大全文集卷第六十一

碣銘

故善士張君墓碣銘 并序

善士張君諱從禮字仲和順州龍山人大父德仁有  
耆行鄉人尊敬之彌義嘗任燕工技府總管既老君  
當襲職請於府曰親老需侍余志已定弟從順賢而  
克荷願昇之竟以從順嗣仲和安清介不隨俗上下  
嘗從澹游先生學詩甚自憇也事母教弟以孝交聞  
承顏讀書外室屢空宴如也君既不樂仕進嘗曰菽  
水盡歡不害養志三釜五鼎非所願也至傭筆以供  
朝夕平生友非逾已而不交曰吾將安做施非當受  
而取曰畏將曷勝弟從順伯婦併歿孤姪敏方三歲

為鞠育成入過於已出至贅子智於友生羊舌氏家  
仍為敏納室是亦人難能也詹事張侯高其孝義憐  
其窮獨出楮幣數千緡付之約得子錢悉助親養君  
以義重德薄謝弗敢當郡國知其賢以孝廉累辟亦  
不就臺憲廉得其實旌焉復之終身君悚然嘆曰人  
子奉親理固當然因而有加邦之教也顧從禮何足  
以為勸其教上明分有如是者所居曲水里有亭沼  
植蒼柏環列挺挺若儼侍溫清暇日哦其間有問者  
對曰余方有厨事子姑去自號栢溪主人左山商公  
韋軒李文皆有文序贊之予入京師之明年君來謁  
亦以溪辭見微貌容愉色津津見眉間今雖已矣尚  
能秀像平時蓋物勵操以孝止善者也至元癸巳

春母氏弃養以哀毀致疾是年冬十月三日考終牖  
下得年五十有六配劉氏亦能安君貧窶卓世生子  
智及二女適裴氏王氏再娶董亦前君歿生子曾葬  
壇州密雲鄉之王冢原友人劉某重契義介嗣子智  
中表其墓以君篤行有類古人者為之銘銘曰

堪輿兩間子職不易孝為化源融而友悌君於二者  
行不少匱濟以廉貞大錫厥類目為善士吾言匪比  
其善伊何可欲之謂况乎質美而學行方而義繫匹  
夫而化鄉人曾克施之弗異五十六年為樂也洵淺  
去水來山密雲之隰隱然斧封山塚屹立是惟吾曾  
張仲之室過者必式後漢張霸性孝讓舉動  
合礼鄉人号張曾子  
故雲中高君墓碣銘并叙

君諱祐字仲和其先雲中人高祖已來遠昭穆無可  
詳者伯父與考金季家撫州以財雄邊伯父德真字  
伯諒潛德不仕考諱德榮伯寬其字也姿醇厚鄉黨  
以德人稱嘗以勞權豐利酒伯母暨君之妣皆張氏  
女以姒姪而列妯娌伯生子曰信字仲禮曰義字仲  
仁信美丰儀虎睛豐頰耳珠赴海以樂終君實仲之  
嗣兒敦死性孝悌及長雖混迹闖闖衆不敢以尋常  
期初燕雲失守豐利府君避地南遷汴梁壬辰歲例  
北徙以實衛墟君與兄信素負心計相與謀曰衛居  
天中寔通都劇邑百物夥繁合散於此若以什一與  
時馳逐可致屋潤遂主貨殖爲業君爲人篤信明敏  
不底蘊留既易彼取收息且廉故聲實四出商販與

集其門貨既饒多不忍頗利自濡以衷多益寡爲得  
每每貸子錢有不克償及群居邸舍積傲直而負者  
審其窘悉折券無難色由是三郎以長者稱於中外  
至元十九年五月四日以疾終于家壽六十有五三  
日葬汝縣汝城鄉南五里之原從新阡也配張氏與  
君德良稱生四子長曰明福以通幹由泰監管勾任  
河南府交鈔庫使次世英世顯世昌孫二人曰夢曰  
莘姪三人曰夢得鄉貢儒士前君卒曰世傑世寧姪  
孫二曰革曰華重孫一曰復亨明年明福以墓碣來  
請銘余以同里巷者五十年知高氏爲最詳即其富  
潤齒息而論蓋自高曾而降凡六世雖存更世故以  
孝義勤儉同居不析故也至君承父兄餘業益光大

於後內則齊理嚴肅以身率先族屬家僅千有餘指  
無間言曰趨事惟謹屋廬被服務從朴素常以驕靡  
為戒外則持心近厚與物無滯敬畏官府奔走輸辦  
未嘗少厭所慮謀生之不勤胡恤王事之時亟也自  
壬子通閱後高氏迄今為河朔名數之冠豈偶然哉  
故遠服賈者雖千萬里外念寬享饒裕獨以高氏為  
讓矧高氏以義致利義重於生因貲致富富而不驕  
為子孫又能求銘以昭世德是又好禮而知本者也  
焉得碎銘曰

富壽	五福先	匪欲厚	能界全
高氏	起雲燕	凡六世	財雄邊
重利	始南遷	縮衛氓	迹市鄆

居家里	無間言	我屋豐	利匪顯
益寡乏	貫子錢	長者祢	動河壩
供厥賦	日翩翩	曾不憚	生勉旃
業攸久	族嬋媯	服而食	耻華鮮
孝與義	為周旋	勤不匱	理固然
繼之者	當鑒焉	行山秀	淇水淵
高氏裔	與並傳		

新鄉縣尹劉君去思碣銘并序

衛之屬邑曰新中鄉其地距太行東麓棄土衍沃浸  
以清泉之潤民俗殷阜自昔號河朔望縣惟其物廣  
而訟囂路衝而務劇故治稱為難然渴餒而易飲食  
者民之心也得其人苟有以附而安之將見民戴之

如父母仰之如神明惟恐來之暮而去之遽也維至元六年南宮劉君理由江淮漕莫來主縣治君姿幹敏有機斂相時處宜果於裁斷既視事思有以事集于上民便於下於是舉條章明約束均賦役却造請凡轡馭之急遽者馴而致之不務高遠率先以身爲度縣當關陝驛程使駟轉致日相望於道吏民疲於供頓君量其輕重處之有方無名而求索者皆以理謝之則乘間侵牟之弊日就歛息廨舍一縣具瞻陋不克治事非所以整暇也計材充工易故而新增葺者十餘楹復起蕭相祠俾吏曹不自鄙薄以信景慕邵公橋跨清水上歲久墊齧競於履危乘隙大撻砥甫齊官柳爲梁方之舊緒既高而固役不知勞而

民免病涉至治道塗取通快堙汙夷峻徒行輦致坦不少阻歲時邵農裹糧自隨周行田里未嘗追呼俾妨時作耕稼蚕績檢括課視切於已私復諭之以勤儉申之以孝悌使遷善而遠罪由是邑里感念昏於作勞生里且滋殖矣下迨鰥寡顛連亦行得所流逋聞之稍稍復業故賦稅輸納不及期而辦詞訟繁囂不俟約而簡君以令行民信教烏可後乃出已稍崇飾朝學如蓋瓦級博之破壞者丹堊漶漫之不鮮者一完而與之復葺黼座陶祭器周繚密垣外障儀闈春秋釋菜禮容爲增肅暇則禮師儒率僚吏暨邑之子弟聽其講說使知所務故三載間庭無留訟牢戶爲屢空至隣有疑讞滯而未決者上官倚之不蔽而

縣之治否爲可知已君既更耆舊苗仲牛世麟慕賓  
羅從玉郭昌祚席安等懷其夙愛有思罔置者來謁  
文以垂示于後辭再四不克仍覽觀件狀而次第之  
且寓夫余之所感焉嘗觀兩漢循吏政顯風化子視  
生民訓牖惠養如恐不及凜然有三代遺風惟其浹  
洽於民者深至故所居即化所去見思有起祠樹碑  
以表夫永載遺賢之意非幸也宜也迨叔世司牧者  
昧於治體苟簡貪墨習爲當然其可聞者不過曉簿  
書以爲能飾矯僞以干譽其於民之休戚漠然如秦  
人視越人之肥瘠甚者因之以急張臨之以形勢剥  
民之肌以膏其身傾民之產以肥其室使民畏之甚  
豺虎惡之劇寇讎告訐謗譴無所不至以理勢論之

亦宜也今劉君以勤強幹敏力矯時弊致績用章著  
吏民稱道如是可謂能也已

銘曰

天下之事孰覈孰綜政發于上相臣是控事終于下  
疇致厥用相須成務匪令奚共雖百里間務實煩閔  
有社有民有賦有貢兵之貧難民之疾痛期會簿書  
風俗獄訟我剖我決我承我奉粵惟良能治之有統  
卜室鳴弦五袴流頌以致 朝堂令無太德庶事日  
康四方風動增秩賜金璽書褒諷繫爾責望得人爲  
重暨暨劉尹事功自恣挺身頽流卓尔爲治不務高  
遠不涉苛細相時政宜因利而利瘼自我蠲聲由實  
致所以懷思去而罔替截鐙願留非愚敢觀胡若稱  
述重聲來世刻石縣門永照鄗衛

故太一二代度師先考韓君墓碣銘 并序

君諱矩字某其先為大梁望族曾祖壽五季時官司諫以銀青榮祿大夫致仕避地北渡遂占藉為衛人祖奕大觀末舉茂才數為縣有聲父渤金初登進士第有文采終獲嘉令君自少以疾不仕資慈祥家故饒財心樂施與凡親舊貧窶里喪有不克襄事者至傾刮囊篋以賙其急或者來謝曰非初心也鄉黨以長者稱天眷間太一始祖真人以神道設教遠近嚮風受錄為門徒者歲無慮千數君舉族清修信禮為尤至香火之奉雖寒暑風雨不輟厥德已而君肉子閻以嗣事為禱真人篆丹符令吞之且曰汝家積善久當產異人既誕師果有奇表真人目之口他日輔

興吾教者此兒也甫免抱即留養道宮三歲識字七歲善書既長儀觀秀偉慧悟絕人批荅辭章捷若影響由清虛師主盟法席二十餘年輔興之言有充而至於極者今追定仙號曰太一二代嗣教重明真人由是而觀韓氏一門之積其來固遠以有是子而論之君之德槩可見矣雖年甫中壽師易韓為蕭至於克荷玄綱光隆教本在韓宗亦為不朽君既歿重明躬葬君於四門里祖塋之次母閻氏祔焉禮也六代度師全祐顧惟傳嗣之重猥及余末于何以圖報維是師真所從出者其潛德幽光表而銘之中心庶獲少安乃以刻文來請師於某祖妣妙清君列叔父行義不可辭遂叙世次而系之以銘銘曰

作善降祥長惡得厲在理必然隨感而至赫赫韓宗  
德顯河衛衍慶及君濬而濟淪俟著而發乃生異人  
異人伊何太一次祖提挈玄綱鵬騫鳳翥庇及本宗  
光隆立土松栢蕭園連崗接武神格仙遊有來容與  
風駕雲軒同翻共馭純化追遠歸厚來見泝流尋源  
以表道根勒銘墓石永賁四門

太一三代度師先考王君墓表

君姓王氏諱守謙字受益博之堂邑人世以播種爲  
業致資產豐阜由以并而計者九衆以株而會者蓋  
萬數焉遂爲里中鉅家然閭門善良薄於世味率道  
之心亟若饑渴聞太一教以符籙濟度世厄所在奔  
是惟恐其後君乃與其配李氏致世真風不遠千里

乞爲門弟子量家歲費外悉以贏餘爲本宮香火供  
有子曰志冲即今太一三代度師也師生而岐嶷七  
歲出就外傳應對進退皆中禮度及毀齒善記誦喜  
讀老莊等書初君董田務於野午憩蔭下寤寐間若  
聞呵喝聲見數青衣人導一童子前來且曰天仙過  
此可少避恍視之無有適師持壺漿來饒君異而不  
出口自度是兒恐終非田舍中物也及長父兄與議  
婚不許曰去家入道乃所願也遂禮二代師爲黃冠  
以經明行脩得度入道士列既嗣法席遭遇道陵特  
賜號玄通大師君聞而喜曰天仙之異誠有驗矣且  
曰平生奉道獲此實報王氏爲有後矣享年七十有  
六考終牖下師以禮葬本縣王莊里祖塋之右母李

氏祔焉今度師勅定仙號曰體道虛寂真人其師真  
之德靈應之蹟詳見墓碑茲不復云六代度師全祐  
嗣教之七年自燕命提點張居祐等以禮幣來謁且  
致其意曰道家者流雖崇尚玄默而太一教法專以  
篤人倫翊世教為本至於聚廬託處似踈而親師弟  
子之兩間傳度授受實有父子之義焉今三代師真  
其在宗門表墓有碑嗣法有傳可謂光且顯矣然物  
之在天壤間未有無本而出者今未有餘榮而本為  
寂然豈厚人倫輔世教之理哉敢百拜以表辭為屬  
幸憲使無拒予以師之言誠為知所本矣遂諾而作  
之表

故真靖大師衛輝路道教提點張公墓碣

銘并序

道有綱紀需人而後弘如上承師真下綜法務以公  
材吏用而開玄佐之功者其鍊師張公乎公諱善淵  
字幾道趙郡平棘人生有異相比長言灑灑有序父  
溥嘗任衛真縣酒坊使時太一四代祖中和真人提  
點毫之太清宮溥素挹真風日侍師於几席間沾沾  
然而喜曰吾兒知所於託遂叅禮為門弟子中和人  
品高邁道價重一世與游者公矧賢士夫一動靜語  
默皆中倫憲公親炙既久日有所得與之俱化若時  
雨然歲壬辰河南大兵公與中和隔離者久之既而  
聞師北渡稅駕於趙迺奔奉焉師忻甚曰奔奏疏附  
吾宗門有人矣即令知太清觀事丙午夏四月侍中

和赴

太后幄殿及見亦霑寵眷奏受真定路教門提點仍賜白錦法服命代中和頒錦幡寶香於崧高太華二祠以祈福祐時衛之祖觀兵燼後鞠為草棘中和界公經理不三數年神庭燕處頓還舊觀二子夏六月復從中和北觀嶺即加號真靖大師以提點衛輝路道教事甲寅歲復奉旨致禮嶽瀆癸丑冬詔天下師德赴燕長春宮修羅天清醮公奉五代貞常真人如會其所以致顯宗教推轂嗣師高出衆表俾道流屬目公力居多已未春

上南巡臨幸壽宮時公以疾不克朝謁上言念舊德道近待存問仍賜御藥葡萄酒服之病良已故中

統二年換受宣詞有云操持堅正祭醮精嚴隨師遠覲於闕庭奉命敬祠於嶽瀆已加玄號宜煥新章之旨道論為榮焉公資清峭貞幹臨事敏而善斷馭衆肅而有方雖一言話出人意表不肯碌碌混常流中生平喜讀書於老子最有得故行已接物多掇其微妙至於禱禳醮祭內嚴外辦綽有餘裕兩從中和北上沈幾先物往返萬里無不如志嘗奉旨給諸道度牒鷓馭所經例有贖公略無私焉其清介遠大又如此壽七十委蛻於太一順事齋室實至元乙亥正月廿五日也越三日陪葬祖塋之次後八年六代祖純一真人念公有力宗門在玄士為傑出有不當泯於後者丐予文以識墓窆因撫其行實而系之以

碑銘曰

真靖受業

始於中和

荆璞雖美

器成琢磨

東瀛北渡

載造玄科

用匪其人

道將若何

公綜玄務

辦於益多

龍庭再召

萬里周旋

竹宮成秩

羽服雲闕

尊師顯教

我力孔宣

玄網張弛

用曲而全

道價軒輕

濟之以權

絕塵而下

歎其才賢

僊游有限

道館驚捐

斲石紀行

以大斯傳

雖高深兮易位

尚知為玄門之玄

提點彰德路道教事寂然子霍君道行碣

銘并序

國朝甲辰乙巳間鹿庵先生教授共城不肖亦忝侍  
几杖時有為全真學者重玄李練師自相下來買田  
於卓泉立棲真別館既而重玄北歸委紀綱士霍君  
明道為之營建不數年翔堂殿廊廡煥然一新際泉  
兩溪盡植巨竹陰翳數百畝中構筠溪亭招致吾徒  
徜徉笑傲其上由是卓泉道院聞於遠邇遙名洞天  
福地之末雖重玄創始之勤而霍君明道實有力焉  
師諱志真號寂然子明道其字也系出安陽縣秋口  
農里大家父諱澤嘗夢一麻衣道士云自天壇來求  
託宿許焉寤而誕師幼不好弄寡言笑既長性淡泊  
不樂榮利弱冠辟親學道父憶夙徵即允其請迺詣

相之天慶宮禮重玄子為門人全真家禁睡眠謂之  
消陰魔服勤苦而曰打塵勞以折其強梗驕吝之氣  
師從事於此者閱三十寒暑略無憚色重玄諭其為  
受道器命主治玄門事挺志誠確措畫井井有法及  
卜築蘇門委之鋪敦教基弘演宗緒俾特達而有所  
樹立焉師披荆榛授瓦礫攻苦食淡擴充師志復闢  
農畝創水磴廣資生理培植教本致遠邇尊禮學者  
日衆至於齋廬深靜井竈修潔遊人過客如歸而仰  
給焉道俗推舉任輝之威儀師滌除玄覽痛自澄治  
務正己以格物有辨訟者率用理遣不知官府為何  
事羽流敬安一方疑重至二十載之久年踰耳順相  
吏民宿仰道價請主天慶宮既至受提點彰德路

道教事凡十有三祀年尊德重不俟言論而衆自化  
服以某年月日沐浴易衣冠無疾而逝壽八十有一  
葬安陽縣王裕里重玄仙塚之側師半度清逸若山  
澤之曠外朴而內敏質直而尚義簡重自居處事得  
時措之宜和同光塵接物無徇俗之弊其訓導徒輩  
言約理到以身為律度可謂純乎其純玄之又玄者  
也門人杜志用夙承提誨圖報無方琢石紀銘期傳  
不朽乃介太一純一真人李公來屬筆予既重李請  
又與師有夙宿之雅既叙其行已而系之以辭銘曰  
道之大原玄文五千誕誇索隱匪其正傳質稟貞素  
心地善淵惟界也全內思靜專耕田鑿井順乎世緣  
修已求志繕吾性天無欲觀妙是為道之自然尚無

往而不可孰間朝市之與林泉若人者雖乘化而委  
蛻安知其精純之氣不乘冷風而仙耶門人攀慕白  
雲翻蹕勒銘松臺何千百年

疑寂大師衛輝路道教都提點張公墓碣

銘并序

師諱居祐字天錫此為汲郡人父道用居樂善東北  
坊以茗飲為業師早失怙恃兄居仁訓育有方甫長  
愿立如成人然向慕玄風亟若飢渴思得大宗師依  
歸以果其腹歲壬辰天兵下河南時太一四代度師  
自拓城北渡應天將撒吉思請主新衛昭順聖后祠  
居仁舉家崇奉遂命師為門弟子居無幾何度師北  
遷住趙之太清宮以師童侍有年謹敬不怠念焉遂

度為道士俄命掌觀之廩料出納詳明儉而中禮曾  
無撮龠之悞度師稱其能時衛之祖觀兵後燬廢掃  
地度師遣提點張善淵詣衛興復且請師以佐葺理  
允焉師為戮力從事小大之役率以身先之既而張  
侍鶴馭北觀營建事師獨任之不十稔壇殿齊室下  
暨庖福庫廡并一新已酉春中和真人還衛願視  
喜其得人已酉冬中和昇寂師辦易葬事焦勞為多  
丁巳冬以事召赴行殿勞歸霑衣幣有加還貞常真  
人以師貞幹有節命知宮事繼陞充提舉中統三年  
上遣使植碑壽宮師復趣辦不踰其素於國光有華  
至元九年六代純一真人嗣主法席以師道行純  
粹勤恪有功言於朝宣授疑寂大師衛輝路道教都

提點七年間道流推服教門增重焉廿六年二月五日得寒疾再宿談笑而逝及歛予臨視面如生吁亦異哉享年七十有二越七日提點范全定等葬師於四門里祖塋之側禮也師為人樂易無~~破~~苟有過須問之人而無憚於改不然咽若有物所梗其歷事三師前後五十餘載護道服勤始卒德不爽純一真人以予鄉曲故持狀來謁銘因憶十九年冬予寓大都道官適師與會宵永無寐龕燈爐火尊俎談舊嘗及萬靈坑事悲世故之無常悼逝者之如是凄然動華表歸語之感故師每歲例清明后一日丐飲酒肴楮幣等物斗量車載展祭塚次以慰鄉梓冥漠之魂惟恐其心之不盡也其於存歿兩間亦遠歸厚之

意也歟是可銘銘曰

太一設教

幽顯兩通

允曰云為

頌人乃崇

猗歟張公

德度冲融

致身福地

逢教之隆

敦考若朴

發之天衷

寂不俗絕

勞而有功

師事三葉

罔異初終

一朝委蛻

為報何豐

祖塋之東

萬栢葱籠

陪葬其側

若堂有封

鏡銘表石

永示無窮

故卓行劉先生墓表

先生諱德洲字道濟襄國中丘人性癖直有操守好學能自刻厲及游潯南王先生門思索辨惑等說自

是厭餒史學為專門之業古心古見非禮義不安言  
動一芥不取於人朋友死雖千里遠徒步必至觀前  
賢竒蹟偉行擊節嘆賞而不能自己至椎耕牛以饗  
竇王殺乘馬而祭昭烈其或憫時之艱急人之難切  
於已私而不置也始則人大以為異既而疑焉終死  
嘆服曰先生篤行直躬守死善道者也北渡後赴戍  
戍試魁河北西路速中統建元三府辟其行能授翰  
林待制晚節知圓鑿方枘不能與時西匿乃以所得  
成就學者立言傳後著三為書數萬言其說為天地  
立極為生民立本為聖賢立法敷析溫公通鑑數百  
條技翊章武俾承正統及見考亭綱目書多所脗合  
沾沾而喜曰吾天地間可謂不孤矣又通古文竒字

士多傳習之九經指授者雖節目礫砢表表有所立  
或惜其獨善不顯諸用然振襄善俗激厲後人多矣  
太保劉公左轄張公以鄉曲義來周卹皆却之曰吾  
非踴躍涼涼闍然媚於世者也至有以禮願交而弗  
之乞者許魯齋每道邢必式問致恭而去壬子秋不  
肖始覲先生於胙對榻學館夜參半欵起撼予曰吾  
於漢丞相亮論議際有所得惜不並時當有說云云  
至元壬午予按部夷儀謁先生於天貺齋樓遲蓬華  
心融一天自樂其樂英發之氣至老不衰先生近何  
賦適作四兗辨天府七星挽章于以張皇幽眇振濯  
漢靈一何壯也臨訣握予手曰吾耄矣斯文未喪子  
其自將行有以畀之既而聞卧疾慮乏調養詢諸友

生始知先生有子樸早世女孫一適康氏子新婦女  
孫皆不聽侍疾卒年七秩有八時至元丙戌九月廿  
二日也葬蓬山之西丘後十五年晚進王寧合鄉國  
議來請曰先生學貫三才養素丘園行媿於古人望  
高乎一世沒當易名用垂光範予謂寧曰士風之不  
振也久矣道義之斷喪也微矣安得高風苦節如先  
生者哉昔孟東野以詩鳴唐張藉私謚曰貞曜程伯  
淳以道自任潞公揭之曰明道今按二例如以卓行  
加之則名與行為顯允矣門生民部尚書戎益將礪  
石表墓以圖不朽大德三年龍集己亥仲冬吉日翰  
林學士中奉大夫知制誥同修國史秋澗王惲為之書  
秋澗先生大全文集卷第六十一

